

2 Mi por lesa

Un palèt di koló




Si awendia un pintor ke traha un pintura kolorido, e ta kumpra tubu di fèrf, pènsel i kanvas i e ta kuminsá pinta. Hopi aña pasá bida di un pintor no tabata dje fásil ei. No tabatin tienda kaminda e por a kumpra tubu di fèrf. E pintor mes mester a traha su fèrf.



Kon esei tabata bai? E pintor tabata kumpra kolorante. Esei ta un sorto di puiro di sierto koló. E tabata meskla e puiro ku zeta òf gòm. Tin biaha e tabata usa awa i dòl di webu tambe. Asina e pintor tabata haña fèrf di e koló ku e tabata ke.



Kon hende tabata traha kolorante di diferente koló? Pa kada koló tabatin un otro manera. Pa traha koló lila por ehèmpel, tabata usa simia di girasol. Tabata bati e simianan hasi fini ku un manga di fensu.



Tabata traha koló kòrà di rais di un mata ku yama ganza. Bo mester a mula e rais te ora e bira un puiro fini. Pa kolorante koló pretu bo mester a kima wesu di animal den un barí tapá. Pa haña koló bèrdè tabata usa koper. Mester a pone e koper den un kòmchi ku binager. Asina e koper tabata bira bèrdè. Despues mester a dirti e koper i mul'è te ora e bira un puiro.



E koló blou intenso tabata un koló karu. Mas karu ku oro mes. Tabata traha blou intenso di e piedra presioso lapis lazuli. Mester a importá e piedra presioso akí di un pais leu, Afghanistan. P'esei tabata usa e koló ei solamente ora mester a traha un pintura di un rei òf reina.



Den un museo bo por admirá kuadro di pintor di tur tempu. Pintura di ántes i di awendia tur tin nan bunitesa. Pero si bo sa kuantu esfuerso un pintor di ántes mester a hasi pa traha su kuadro, lo bo wak su pinturana sigur ku un tiki mas admirashon.

3 Bo a komprende?

- Lesa e teksto huntu ku bo grupo.
- Bo a komprende e teksto?

Pregunta

1. Kiko ta título di e teksto akí?
2. Purba di splika kiko un palèt ta.
3. Kiko ta tópiko di e teksto akí? Esta, kiko e teksto ta trata? No usa mas ku tres palabra pa duna e tópiko.
4. Kí sorto di teksto esaki ta? Skohe entre:
 - A. Un kuenta
 - B. Un teksto informativo, esta un teksto ku ta siña bo algu.
5. Kiko un pintor ta kumpra awendia si e ke traha un pintura?
6. Dikon ántes bida di un pintor no tabata fásil?

7. Kiko ta kolorante?
8. Ku kiko e pintor tabata meskla e kolorante pa e traha fèrf?
9. Kon tabata traha kolorante koló lila?
10. Di kua mata tabata usa e rais pa traha koló kòrà?
11. Kon tabata traha kolorante koló pretu?
12. Splika kon bo ta haña koper ku koper?
13. Dikon e koló blou intenso tabata asina karu?
14. Pakiko ta solamente pa pintura di rei of reina tabata usa e koló ei?
15. Dikon hende mester wak e kuadronan di e pintoran di ántes ku un tiki mas admirashon?